

## PRILOG 1.

### **Kriteriji za dodjelu stipendija redovnim studentima prvog i drugog ciklusa studija s prebivalištem na području Zeničko-dobojskog kantona za akademsku 2021/2022. godinu**

#### **Član 1. (Korisnici)**

Korisnici stipendije su redovni studenti prvog i drugog ciklusa studija s prebivalištem na području Zeničko-dobojskog kantona, do 30 godina starosti, koji nisu ni u kakvom radnom odnosu i koji ispunjavaju uvjete utvrđene ovim kriterijima i konkursom.

#### **Član 2. (Pravo učešća na konkursu)**

Pravo učešća na konkursu imaju kandidati koji ispunjavaju sljedeće uvjete:

- a) da su državljani Bosne i Hercegovine;
- b) da imaju prebivalište na području Zeničko-dobojskog kantona;
- c) da su redovni studenti prvog ili drugog ciklusa studija na visokoškolskim ustanovama u Bosni i Hercegovini ili izvan Bosne i Hercegovine, bez obzira na način finansiranja studija (redovni koje finansira osnivač visokoškolske ustanove i redovni samofinansirajući);
- d) da su upisali ljetni semestar akademske 2021/2022. godine,
- e) da nisu stariji od 30 godina i nisu ni u kakvom radnom odnosu.

Pravo učešća na konkursu nemaju:

- a) studenti koji koriste usluge smještaja i ishrane u studentskim domovima;
- b) studenti koji primaju stipendiju od drugog stipenditora;
- c) studenti za koje je utvrđeno da su, protivno datoj izjavi u prethodnoj akademskoj godini, primili stipendiju od drugog stipenditora;
- d) studenti koji obnavljaju godinu studija,
- e) studenti koji su već jednom dobili stipendiju za određenu godinu studija na istom ili drugom fakultetu
- f) studenti u statusu absolventa;
- g) studenti koji su u akademskoj 2020/2021. godini ostvarili pravo na stipendiju kao studenti prve godine studija, a u akademskoj 2021/2022. godini ponovo upisali prvu godinu studija na nekom drugom fakultetu.

#### **Član 3. (Lista kandidata)**

(1) Lista kandidata za dodjelu stipendija sačinjava se na osnovu ukupno ostvarenog broja bodova koji se dodjeljuju po osnovu uspjeha, godine studija, materijalne situacije, socijalnog statusa (studenti sa invaliditetom i studenti bez oba roditelja) i na osnovu deficitarnih zanimanja.

(2) Pripadnici romske nacionalnosti imaju pravo na bezuvjetnu dodjelu stipendije.

#### **Član 4.**

## (Bodovanje)

### (1) USPJEH

Bodovanje studenata **prve godine prvog ciklusa studija** vrši se tako što se:

- a) prosječna ocjena uspjeha uveća za 4 i množi koeficijentom 5 (uspjeh *odličan*),
- b) prosječna ocjena uspjeha uveća za 3 i množi koeficijentom 5 (uspjeh *vrlo dobar*),
- c) prosječna ocjena uspjeha uveća za 2 i množi koeficijentom 5 (uspjeh *dobar*),
- d) prosječna ocjena uspjeha uveća za 1 i množi koeficijentom 5 (uspjeh *dovoljan*),
- e) studentima prve godine koji su bili učenici generacije u srednjoj školi dodaje se još 25 bodova.

Bodovanje studenata **druge i viših godina prvog ciklusa studija i drugog ciklusa studija** vrši se tako što se:

- a) prosječna ocjena svih položenih ispita tokom cjelokupnog prethodnog studija (uključujući i ispite položene u akademskoj 2021/2022. godini) množi koeficijentom 5,
- b) studentima koji su ostvarili prosječnu ocjenu najmanje 9,00 ili ekvivalent, pored množenja koeficijentom 5, dodaje još 5 bodova.

**NAPOMENA:** *Prosječna ocjena svih položenih ispita tokom cjelokupnog prethodnog studija u drugom ciklusu studija uključuje i ocjene iz prvog ciklusa studija.*

### (2) GODINA STUDIJA:

- a) studenti druge godine - 4 boda
- b) studenti treće godine - 6 bodova
- c) studenti četvrte godine - 8 bodova
- d) studenti pete godine - 10 bodova
- e) studenti šeste godine - 12 bodova

**NAPOMENA:** *U skladu sa članom 5. stav 1. Okvirnog zakona o visokom obrazovanju u Bosni i Hercegovini, prvi ciklus studija traje najmanje tri i najviše četiri godine. Jedna godina studija vrednuje se sa 60 ECTS bodova (European Credit Transfer System). Iz odredbi člana 5. stav 1. izuzima se studij medicinske grupe nauka, koji se u prvom ciklusu studija vrednuje do 360 ECTS bodova, odnosno, koji može trajati do 6 godina. Drugi ciklus studija traje jednu ili dvije godine (zavisno od trajanja prvog ciklusa studija) i vrednuje se tako da u zbiru s prvim ciklusom studija nosi 300 ECTS bodova. Koncept trajanja prvog i drugog ciklusa studija može biti: 3+2 ili 4+1. Studentima prve godine drugog ciklusa studija po konceptu 3+2 dodaje se 8 bodova (što odgovara četvrtoj godini studija). Studentima druge godine drugog ciklusa studija po konceptu 3+2 dodaje se 10 bodova (što odgovara petoj godini studija). Studentima drugog ciklusa studija po konceptu 4+1 dodaje se 10 bodova (što odgovara petoj godini studija).*

### (3) MATERIJALNI STATUS

Bodovanje se vrši na osnovu ukupnih mjesečnih primanja porodice po članu domaćinstva, a prema kućnoj listi i priloženom dokazu o statusu za svakog člana domaćinstva:

- a) do 60 KM - 25 bodova;
- b) 61 KM - 100 KM - 20 bodova;
- c) 101 KM - 150 KM - 15 bodova;
- d) 151 KM - 200 KM - 10 bodova;
- e) 201 KM - 250 KM - 5 bodova;
- f) 251 KM - 300 KM - 1 bod;
- g) preko 300 KM - 0 bodova.

### (4) SOCIJALNI STATUS

- a) invaliditet studenta (po bilo kom osnovu)
1. do 40% - 3 boda;
  2. 40 - 70% - 5 bodova;
  3. preko 70% - 8 bodova.
- b) studenti bez oba roditelja - 10 bodova.

#### **(5) STUDENTI KOJI SE OBRAZUJU ZA DEFICITARNA ZANIMANJA**

Deficitarna zanimanja:

Doktor medicine, Edukator-rehabilitator, Magistar farmacije, Veterinar, Softver inženjer, IT inženjer, Inženjer informatike, Inženjer zaštite na radu, Inženjer geodezije, Inženjer elektronike, Profesor fizike– 8 bodova.

*NAPOMENA: Korištena je terminologija sa evidencije JU Služba za zapošljavanje Zeničko-dobojskog kantona (nazivi zanimanja).*

**(6) PRIPADNICI ROMSKE NACIONALNOSTI i DJECA BEZ OBA RODITELJA O KOJIMA SE BRINE DRŽAVA** imaju pravo na bezuvjetnu dodjelu stipendije.

#### **Član 5. (Novčana nagrada)**

(1) Studentima koji studiraju za deficitarna zanimanja, defisana u članu 4. stav (5) kriterija, a ujedno imaju prosječnu ocjenu najmanje 8,50 ili ekvivalent pored stipendije dodjeljuje se novčana nagrada u visini koju utvrđuje Vlada Zeničko-dobojskog kantona.

(2) Odredba stava (1) ovog člana ne odnosi se na studente I godine I ciklusa studija.

#### **Član 6. (Lista prioriteta)**

U slučaju kada se pojavi veći broj kandidata za dodjelu stipendija, Ministarstvo za obrazovanje, nauku, kulturu i sport Zeničko-dobojskog kantona utvrđuje listu prioriteta prema odredbama člana 4. ovih kriterija.

#### **Član 7. (Konkursna procedura)**

(1) Stipendije se dodjeljuju na osnovu konkursa koji se objavljuje u jednom od dnevnih listova i u listu „Naša riječ“, na općinskim/gradskim oglasnim pločama i na službenoj internetskoj Zeničko-dobojskog kantona.

(2) Prijave na konkurs sa potrebnom dokumentacijom kandidati dostavljaju resorno zaduženim službama za društvene djelatnosti općine/grada u kojoj imaju prebivalište.

(3) Bodovanje i rangiranje kandidata za dodjelu stipendija vrši komisija nadležne općinske/gradske službe.

(4) Rukovodilac nadležne općinske/gradske službe rješenjem formira komisiju koja vrši bodovanje i rangiranje kandidata te objavljuje **preliminarnu listu** prema broju bodova, ostvarenim na konkursu.

(5) Sve eventualne **prigovore** (obrazložene i utemeljene na dokazima) na preliminarnu listu, kandidati mogu podnijeti nadležnoj općinskoj/gradskoj službi u roku od 8 dana od objavljivanja na oglasnoj ploči matične općine/grada.

(6) Nakon razmatranja podnesenih prigovora, komisija sačinjava **konačnu preliminarnu listu (spisak studenata koji su u konkurenciji za dodjelu stipendija)**, koju objavljuje na oglasnoj ploči općine/grada i dostavlja Ministarstvu za obrazovanje, nauku, kulturu i sport Zeničko-dobojskog kantona radi dodatnih provjera.

(7) Nakon dodatnih provjera iz stava (6) ovog člana Ministarstvo za obrazovanje, nauku, kulturu i sport Zeničko-dobojskog kantona dostavlja **konačnu listu** općinama/gradovima, a koju općine/gradovi objavljuju na oglasnoj ploči i web stranici i na koju kandidati imaju mogućnost ulaganja **žalbe**.

(8) Žalba iz stava (7) ovog člana se podnosi putem nadležne općinske/gradske službe Ministarstvu za obrazovanje, nauku, kulturu i sport Zeničko-dobojskog kantona u roku od 8 dana od objavljivanja konačne liste na oglasnoj ploči/web stranici općine/grada.

(8) Ministarstvo za obrazovanje, nauku, kulturu i sport zadržava pravo da u toku konkursne procedure, a na osnovu slučajnog uzorka, izvrši uvid u bodovanje koje vrše općinske/gradske komisije.

### **Član 8.** **(Način isplate sredstava)**

(1) Isplatu sredstava vršit će nadležne općinske/gradske službe putem tekućeg računa studenta, a prema Konačnoj listi koju utvrđuje i dostavlja Ministarstvo za obrazovanje, nauku, kulturu i sport Zeničko-dobojskog kantona.

(2) Nadležna općinska služba dužna je dostaviti Ministarstvu izvještaj po isplati doznačenih sredstava.

### **Član 9.** **(Objavljivanje Kriterija)**

Kriteriji za dodjelu stipendija redovnim studentima prvog i drugog ciklusa studija s prebivalištem na području Zeničko-dobojskog kantona, do 30 godina starosti i koji nisu ni u kakvom radnom odnosu, za akademsku 2021/2022. godinu objavit će se na općinskim/gradskim oglasnim pločama i na internetskoj stranici Zeničko-dobojskog kantona.